

四庫全書

史部

欽定四庫全書

平定兩金川方略卷一百二

七月己卯富德奏言據深嘉卜山梁三卡千總張正邦等報稱本月初七日明正土兵當巴出卡取水被賊掠去張正邦聞信即領兵將當巴奪回又初八日有五十餘賊乘霧奪搶把總馬繼武卡倫張正邦又領兵救援殺賊十餘人時土兵綽窩追至林下正欲割取賊首因林內賊人哭出受傷二

處經張正邦殺散賊匪救出

臣

現將布拉克底巴

旺等處土兵酌量添駐各卡倫益加固守以資防

禦奏入

上諭軍機大臣曰富德痛殲潛來賊匪堅守卡倫殊為
妥善此時將軍等已經深入賊人窮迫尚敢暗來衝
我卡倫深為可恨必須盡戮無遺又張正邦守卡殺
賊土兵綽窩因砍取賊首以致受傷皆屬奮勉著富
德酌量獎賞以示鼓勵

辛巳阿桂豐昇額色布騰巴爾珠爾奏言臣等查該布達什諾木城在山巒突起處賊人聚守甚堅且十三四五等日陰雨連綿間以飛雪雲霧四塞賊人木城無從望見又膠泥滑溜亦不能攀躋用力臣等熟察木城之左即係山溝並無路徑賊料官兵斷難行走若從此繞至該布達什諾木城之後山腿之上即可斷其後路當派海蘭察等帶領索倫吉林屯土兵練六百名從溝內繞過賊人木

城搶拈後山腿但箐林深長必須步步接應復派侍衛楚巴什等帶兵下至溝底為海蘭察等接應又派胡尼爾圖帶兵為楚巴什等接應其該布達什諾左手之什爾德山梁賊卡派令成德特成額等帶兵攻打作為牽綴而該布達什諾木城正面則派令官達色海祿倭昇額保寧瑪爾占格勒爾特秦斐英阿等督兵攻撲不使賊人知我繞進之兵至色溯普前面碉卡其右手山脊之下前日雖

從此進攻但須下至溝底路徑遼遠已有賊人防
守未易繞進因派烏什哈達等進攻賊碉之右木
城水碉福康安普爾派等進攻向南山腿嘉德古
碉卡以分賊勢而額森特等仍從正面攻打大碉
富興等帶兵接應分撥已定至十六日天氣稍晴
即於是夜發兵至十七日寅刻先令官達色等帶
兵抵該布達什諾正面木城下竭力攻打海蘭察
等隨即帶兵由左手山溝潛進繞過木城各官兵

攀林附石不避險滑奮迅遄行賊人全未知覺比至天色黎明海蘭察已繞過箐林佔據該布達什諾木城後山腿之上上面派兵將附近寨落焚燒勦殺惟是此一帶攢集賊人不少一見官兵已出其後要隘將失悉力前來連次衝撲海蘭察之隊滿洲索倫官兵俱各向前迎擊鏖戰經時海蘭察及侍衛官兵所帶箭枝幾盡斃賊無數並有兩頭人帶箭竄回餘賊遁入木城石卡臣等見賊捨死

抵拒又派健兵四百名前往接濟而是日早間已
有微雨及午未間北風忽作雪霧瀰漫海蘭察等
因官兵力戰一日且天時將晚不能分兵砍運木
植官兵難以存駐即從原路撤回惟時官達色海
祿等兵在該布達什諾木城前面左右合力攻撲
詎賊人木城外又圍木柵兩層每層之外挖有深
溝其木城上又有片板以防官兵拋入火彈而兩
旁林箐及木柵中間又擲石放鎗如雨官兵從鎗

石叢中將板片墊過第一層壕溝扳開木柵進至第二層賊人守禦益堅扳柵官兵被賊砍傷手指甚多正在相持間而海蘭察等以從此撤出較為妥便遂帶兵轉上山腿作為夾攻木城之狀而密令土兵從山腿之右踰開道路帶兵衝殺繞出與官達色等會合同漸次撤回至額森特等遙見該布達什諾之後各寨烟起知海蘭察等業經繞出料賊人必悉力往救則色溯普右手山溝之下

備禦稍疎可以乘勢繞截即令富興等攻打大碕
前面帶兵下溝前進直上色湖普前面賊碕之後
山梁一面派兵焚燒山腿下寨落一面將營盤擊
住臣等查色湖普山腿迤邐而西南該布達什諾
山腿迤邐而西其間有了口一處過此即遜克爾
宗本為賊人來往之地是以務須繞過截斷但額
森特之兵自山溝繞進已三十餘里路徑極為險
惡且我兵既可截斷賊人後路賊又可從得斯東

遜克爾宗來截我兵之後隨於十七日晚飛令普爾普烏什塔達等帶兵前往於緊要處所分段防遏但色溯普前面山腿地勢甚長官兵雖已環其三面而向南之嘉德古溝一面賊人尚可往來且額森特所帶官兵無多未能悉行分兵截斷復於十八日調令海蘭察胡尼爾圖帶兵二千從色溯普北面山溝前往既為額森特添助聲勢且由額森特處橫過遜克爾宗了口仍搶佔該布達什諾

木城後山腿賊即難於據守同日仍令富興等進
攻色溯普前面大碉福康安等進攻向南山腿嘉
德古溝上之碉卡成德官達色等進攻該布達什
諾木城並令刻刻伺賊間隙迅攻奮取而又令於
十九日子刻各處齊進務期必得是夜亥刻海蘭
察等之兵已至額森特所據山梁隨帶兵繞從嘉
德古溝仍往據該布達什諾木城後之山腿賊見
各處官兵合力奮攻且又恐截其後頗露恍亂情

形官兵乘勢拆柵上碉無不勇氣百倍富興等將
色溯普前面大碉攻克福康安等將向南山腿碉
卡攻克成德官達色等將該布達什諾木城石卡
攻克其海蘭察帶兵將抵該布達什諾山腿之後
有賊百餘名直前衝突我兵矢發如雨斃賊多人
餘賊奔逃於是督兵追殺奪獲畢里覺等寨派兵
燒燬額森特帶兵順梁而下隨奪獲巴咱拉噶爾
畢里覺奈斯吉等寨又令侍衛額爾特從色溯普

山腿北面下溝奪獲斯達木格拉斯當噶克卡爾
巴岳等寨烏什哈達奪獲得斯東全寨亦俱焚燬
維時成德官達色等所領官兵迅速前進與海蘭
察會合海蘭察之兵又與額森特聯絡現已并力
進圍遜克爾宗官寨此一帶即係格魯瓦覺地方
共計攻克大碉二十三座燒燬寨落七八十處共
殺賊人三四百名奪獲軍中器械等物無算查此
路大兵自攻進以來節次摧開要隘且殲戮醜類

實繁有徒訊據投出番人供稱索諾木弟兄俱親
來遜克爾宗將勒烏圍各寨番人能持軍械者攢
集前來蓋因大兵日進日深其護巢衛死實屬不
遺餘力是以海蘭察繞進該布達什諾後面時賊
人明來衝突敗而復前散而復聚捨死苦鬪被我
兵殺賊甚多并將至險之地復行攻克並焚其寨
落無數賊衆益為喪膽至遜克爾宗官寨在山腿
迤邐將盡峯巒復起之處止有一面可以仰攻但

或斷其水道或從拉枯喇嘛寺等處截其後路自
不難於得手

同日明亮舒常奏言查木克什山頂上一礮賊尚
憑高拒守經奎林用礮轟摧已將礮牆轟坍半截
我兵一擁上前賊人措手不及即經克取其南面
下拖山腿突起石包賊於其後聯絡石卡依以為
固三寶等連日轟打因有石包阻隔未為得力臣
等查達爾圖山梁橫亘八九里西南則木克什向

西山腿賊礮牽綴於右東北則頭敵向外山觜賊礮牽綴於左若處處多為設守所餘官兵為數無多即難懸軍深入再四熟籌必須將頭敵四礮一並攻克則直下濱河皆可施展兵力但賊人明知此路最為緊要捨命聚守臣等現將礮位安放頭敵眼見礮子所擊直透礮根隨時坍塌賊斃於礮內者必多現聞索諾木親來救援是以賊衆尚在勉強相持臣等惟設法籌辦稍有一隙可乘即當

分派官兵四面並進均奏入

上諭內閣曰阿桂等奏七月十八九等日將該布達什諾嘉德古色溯普山腿碉卡木城悉行攻克并焚燒格魯瓦覺各處寨落現在進圍遜克爾宗等語連日正盼捷音覽奏深為欣悅大兵屢次攻克要隘我武更揚指日迅掃賊人巢穴早奏層功皆由將軍參贊等調度有方領隊鎮將等於地利軍情俱皆熟悉故能動合機宜深可嘉尚均著交部從優議叙其在事

出力打仗官兵並著查明咨部議叙以示鼓勵

上諭軍機大臣曰此次攻取格魯瓦覺等處將軍大臣等鼓勵官兵人人奮戰攻克至險地方殲戮來衝賊衆甚為欣慰除將軍大臣侍衛官員兵丁等降旨交部議叙外其頭等侍衛拉布巴爾巴圖魯瑪爾占自抵軍營久經出力此次又奮勇得傷著加恩賞給副都統銜其陣亡得傷官兵著阿桂等查明咨部照例議叙有應行賞給巴圖魯名號者亦即奏聞俟朕加

恩賞給海蘭察倡率官兵攻奪險要木城碉卡痛殺賊人洵屬超衆額森特原係勁將自派往軍營奮勉出力凡遇打仗能調度得宜首先殺賊亦屬可嘉從前曾經賞給海蘭察額爾克巴圖魯額森特丹巴爾圖魯今改賞海蘭察綽爾和羅科巴圖魯名號額森特墨爾根巴圖魯名號並著賞海蘭察銀三百兩額森特銀二百兩現在大兵已圍遜克爾宗著阿桂諭知伊等令其益加奮勉迅奏膚功受朕重恩

上又諭軍機大臣曰阿桂調度得當可謂善於用兵而海蘭察額森特尤為勇畧超羣是以此一路賊人險隘俱經官兵攻克遜克爾宗正可乘勝勦取直抵勒烏圍據稱其地止有一面可以仰攻或當斷其水道或從拉枯喇嘛寺繞截其後自不難於得手等語就圖而論拉枯喇嘛寺即在現得格魯瓦覺之旁勢亦不可不取若先攻克拉枯喇嘛寺即由彼繞擊遜克爾宗之後甚屬便捷可以一舉兩得阿桂等自必計

出於此也同日明亮奏奎林又將木克什山頂一碇
用礮轟摧殲戮殆衆甚屬奮勉俟將達爾圖一帶碇
卡盡數勦洗壓下再行優叙至前次聞丹巴沃咱爾
赴達爾圖抵禦令明亮聞索諾木亦親來救援丹巴
沃咱爾乃賊中之最狡黠者諸事宜加意嚴防而逆
酋索諾木親至其地賊衆自更為之捨死用力但賊
酋賊目實皆罪大惡極為覆載所不容明亮若能設
法將索諾木丹巴沃咱爾一併俘擒其功實為不小

務須努力為之但大功正屆將成尤當動出萬全不可稍有絲毫罅隙為賊所伺方為妥善將士等亦不可因屢勝之後志足意滿稍涉驕矜或致疎於防範同日阿桂豐昇額色布騰巴爾珠爾又奏言查勒烏圍係賊人要隘舊巢本與噶拉依相等是以賊酋將遜克爾宗一帶糧食搬往存貯以為死守之計今仰仗

天威臣等大兵已逼賊巢明亮一軍已克宜喜堅碉訊

據投出番人有索諾木帶兵來至勒烏圍欲往宜
喜之說賊酋既併力於此一處則噶拉依之禦備
自應單弱而攻噶爾拉當噶爾拉及昔嶺等處亦
料無多人聚守此時不論何路督兵進勦原可期
其得利但此時努力進攻斷無可分之兵且分一
路官兵又須設一路糧站驛臺轉不免徒稽時日
况臣等一抵勒烏圍其凱立葉丹壩官兵更無阻
滯即可將勒烏圍東北一帶寨落逐一掃淨而明

亮宜喜之兵下至河濱循河而東至噶拉依賊巢
對過即出馬爾邦庚額特之後與富德絨布官兵
會合便可合搗噶拉依擒渠掃穴早為歲事奏入
報

聞

八月壬午

上諭軍機大臣曰郭羅克賊番現雖不能滋生他釁然
其人窮狠無依志在乘便竊劫内外商旅頗受其累

而其地相通西藏尤不可不急示嚴懲况郭羅克較諸番更難化誨其所以不致如兩金川之跳梁者因現無與索諾木莎羅奔丹巴沃咱爾相類之人故不敢肆逞萬一有之未嘗不能為害不可不思患預防阿桂前署總督時曾辦郭羅克之事諒必深知之此輩克惡窮番向由地方官轄管而庸劣文武既不能撫之以理又不能懾之以威當平常無事則縱兵役作踐視之不啻如禽畜及略為作梗則圖逃避畏之

又不啻如虎狼實為有損無益朕深以此為念并料
索諾木等窮蹙時必逃郭羅克以冀稍緩須臾之死
業已傳諭各路邀截或逆酋竟乘空逸出不可不即
速追擒郭羅克境雖畧廣然地勢平坦非若金川之
有險可憑如果逆酋竄往阿桂即當提連勝之兵壓
境擒渠並討郭羅克賊番之罪實為一舉兩得若逆
酋並不逃往則無故移師朕又不肯為此窮兵黷武
之事只可於辦理善後時使之有恩可感有威可畏

庶可以潛消桀驁之心而束之於法度之內方可謂之一勞永逸

癸未鄂寶顏希深奏言

臣

鄂寶聞將軍明亮攻克

達爾圖山梁一切糧務臺站均須務為籌辦隨赴

宜喜會同

臣

顏希深商酌所有沿途運糧人夫俱

令設溯招募添用其難於雇覓之處即將新到人

夫撥補至分貯各站軍米除陸續供支外尚存米

四千餘石又臬司李世傑稟稱業經酌撥吉地存

米四千石及於打箭爐倉撥米二千石長運木池
更自足供支食其人夫一項先於西路備用人夫
內酌撥此路以資應用茲陸續解到人夫一千九
百餘名臣即量為分安附近各站俟將軍明亮統
兵前進即可就近調安新站並據李世傑稟報現
由南路撥夫一千餘名將來足敷應用無庸更費
周章惟是鑄造礮子需用生鉄前因將軍豐昇額
移兵凱立業所餘銅鉄業經督臣富勒渾調赴西

路今將軍明亮由此進勦每日所需生鉄礮子較

多臣鄂寶行知沿途各站如有現存礮子星飛解

運又復商同臣顏希深飛咨省局作速派解並札

知李世傑將吉地存貯鉄觔就近撥運現據該處

已酌撥生鉄一萬觔更為捷便再查由達圖山梁

下壓勒烏圍賊巢中隔一河勢須濟渡上年周臬

格江兩處曾製皮船五十隻備用但需時已久不

無損壞臣鄂寶昨過格江時面諭站員令其上緊

修理備用復因格江一河下通勒烏圍該處將來
成造船隻所需釘油麻等項亦宜先為預備臣等
已札行軍需局速為辦解以備調用奏入報

聞

同日

上諭軍機大臣曰昨阿桂等奏官兵連次克捷現已進
圍遜克爾宗雖有賊人拒守無難破險摧堅徑抵勒
烏圍勒烏圍係賊苗巢穴當必捨死守禦但官兵既

近逼賊巢大勢已失加以官軍勇銳賊酋自難以久
持第恐其情窘計窮相率乞降以冀緩死將軍斷不
可為其所惑稍存姑息金川負恩肆逆罪大惡極自
取滅亡必當明正刑誅以快人心而懾邊徼必官軍
費如許力量始得平定其地不當以受降完結使諸
番無所儆畏且不可留此餘孽復滋後患著傳諭阿
桂等若逆酋索諾木及莎羅奔兄弟等此時諸營求
降惟即擒拏俘獻不得稍有游移並當曉諭諸番咸

知此意至前據脫出番人供稱僧格桑已死金川賊
酋將屍往獻軍營因將軍等不受即埋在遜克爾宗
等語今官兵剋日可得遜克爾宗阿桂到彼時務先
訊明被獲賊番即剋出屍身辨認明確割取首級解
交文綬于成都暫存俟擒獲逆酋索諾木及莎羅奔
兄弟并賊黨丹巴沃咱爾時俘馘一同解獻至阿桂
攻得遜克爾宗時所有凱立葉之賊或不攻自潰
倘賊尚存聚其處豈可置之我兵之後著傳諭阿桂

於攻破遜克爾宗之時一面進攻勒烏圍一面令豐
昇額帶兵數千前往凱立業與五岱官兵兩面夾擊
賊自難於存匿迨攻克凱立業豐昇額仍帶兵至阿
桂處會攻勒烏圍

丁亥富德奏言據駐守深嘉卜守備田藍玉報稱
本月十七日有賊三百餘人來奪碉卡田藍玉即
留兵一半防守一面接仗賊見我兵無援即分數
隊前後衝擊千總張正邦把總馬繼武等及巴旺

小頭人則吉四面衝殺自己至中兵斃賊人三十餘名受傷甚多漸入樹林敗走馬繼武郭連熊久鳳則吉等越衆窮追馬繼武郭連熊二人胯中鎗傷郭連熊久鳳陣亡奏入

上諭軍機大臣曰現在阿桂已圍遜克爾宗明亮已攻克達爾圖即日可抵勒烏圍賊勢窘迫仍敢衝我卡倫蓋欲自露並未窘迫之意深為可恨富德於各處要隘派兵勦殺甚屬妥善至千總張正邦奮勇打仗

斃賊甚多仍能守住碉卡五座實屬黽勉出力著加
恩陞為額外守備遇缺即補仍賞戴孔雀翎把總馬
繼武四面接戰殺死二賊受傷後仍能擊敗賊匪亦
屬超衆出力著加恩授為額外千總遇缺即補巴旺
小頭人則吉從前跟隨將軍阿桂明亮等奮力打仗
此次殺敗賊衆自屬黽勉著賞給千總頂帶並戴藍
翎其陣亡得傷官兵著富德查明造冊送部照例賞

卹

同日五岱奏言

臣接奉

諭旨將軍阿桂一路已經深入五岱善為防守後路堵
禦賊人臣現在凱立葉山梁至達里克山各營棚
俱擇要地安設賊衆斷不能侵臣又親至莫爾敏
山查看谷噶一路及保寧所駐之北山上營棚與
莫爾敏山卡座相隔不遠臣相其地勢中間設卡
三座每卡留兵駐守直接保寧駐扎之所則谷噶
凱立葉間官兵已經聯絡賊衆斷難偷越臣仍不

時派侍衛官弁晝夜巡查留心堵禦如有賊人滋擾彼此救應勦殺奏入

上諭軍機大臣曰五岱奏於凱立業谷噶兩路中間造卡駐兵所辦甚屬妥善將軍阿桂等業已統兵深入惟恐後路或有賊人潛來侵擾今五岱自凱立業至保寧營卡均已駐兵防守是將軍後路連續相通儘可無慮五岱所辦可嘉此時惟俟大兵將抵賊巢豐昇額領兵掃蕩凱立業後五岱即將彼處之兵酌留

防守其餘者帶往丹壩以禦逆酋奔竄

同日郝碩奏言查西路官兵鹽菜及各站夫役工食每月約需銀十五萬兩嗣因副將軍豐昇額帶兵四千五百名來至西路並續添滇兵三千名而凱立葉官兵糧餉亦歸併西路支領是以每月共需銀二十萬兩今宜喜軍營副將軍明亮帶兵七千名與原有官兵合計每月鹽菜並共站夫役工價又共需銀十萬兩臣查每月軍餉自內地解至

楸砥分為兩路一由卓克采運赴北路一由大板
昭運赴西路而自楸砥至桃關尚有十站為西北
兩路運送必經之區向來內地解送餉銀每日或
十萬及十五萬二十萬不等各站均須用夫數百
名雖派有弁役護送而口外山高路險餉鞘既多
難於照應且餉鞘需夫既多則逐日滾運米石自
少必須均勻解送令其並行無碍嗣後內地解運
餉銀俱請酌定每起以五萬為率按日陸續運銀

則解餉人員沿途易于照料而各站運夫不至一時擁擠即可將所餘夫力多運米石庶軍食更可充裕

同日郝碩又奏言各站額設人夫向由內地各州縣照糧派雇指定站所撥差押送到站供役遇有差務殷繁之時長夫不敷應用即就近雇募客夫蠻夫以濟緊急辦理以來向無貽悞臣自去秋到營後見蠻夫供役多係攜帶家口并有驢騾在站

居住領運軍糧軍火頗為得力至本年三月農忙
各蠻夫回籍耕種留站者甚少隨將各州縣派委
長夫內有年滿自願留站者飭令該管州縣照例
給予安家銀兩即於換班夫額內扣除以省往還
糜費今秋成已畢沿途復有蠻夫到站臣思此項
蠻夫向屬得力而逐日按計背數給與工價口糧
似較省便且蠻夫所帶驢騾每匹可馱米糧三斛
較之人夫不啻兼程并站指日大兵三路會合需

用軍糧火藥倍增即將此項蠻夫應用無庸力派里夫致滋內地解送之煩且使之兼程趕運軍需益加充裕臣隨飭各站員加意撫循俾其安心供役以期得力均奏入

上嘉之

同日富勒渾郝碩奏言現在官兵兩路合圍遜克爾宗臣等隨赴格魯瓦覺軍營將餉道糧運事宜通盤籌畫查喇穆喇穆山溝本係運糧正路前因

賊人據守山梁是以由登古一帶繞道運供今喇
穆喇穆山梁既全佔據直抵遜克爾宗應即於喇
穆喇穆遜克爾宗適中之牛廠地方安設一站以
利轉輸已將官員夫馬分撥安設惟現在官兵尚
由色湖普一路夾攻勢不得不分頭接濟所有登
古一帶臺站未便遽裁此時應暫以喇穆喇穆站
為總匯之所一由南山梁新安牛廠運供一仍由
北山梁登古等處運供一俟攻得遜克爾宗大兵

合併即可均由牛廠運行其色湖普一帶有無防
駐官兵該處糧臺應撤應留臨時再行酌定奏入
上嘉之

平定兩金川方畧卷一百二

欽定四庫全書

平定兩金川方畧卷一百三

八月庚寅阿桂豐昇額色布騰巴爾珠爾奏言臣查遜克爾宗官寨在山腿下峯巒復起之處而自色溯普山腿相連遜克爾宗中間一道峯脊上賊人又豎立大木柵四座大石碣四座木柵石碣之後又有寨落相連極為稠密而遜克爾宗高砦之下兩旁環以深溝其在右平田內寨落甚多麥始

黃熟收割者尚不及十之一二臣等自十九日分
兵圍繞復即派兵埋伏或伺賊人潛來割麥乘機
掩殺或令我兵往割誘使前來滋擾痛加誅殛連
日以來皆有殲戮二十一日復奪取什爾德山梁
大木城一座石碣五座臣等公同酌議色溷普山
腿相連峯脊所有木柵石碣及碣柵後寨落均為
遜克爾宗屏蔽必先掃淨而左右田中寨落亦應
盡數掃除賊勢既孤攻取自易時海蘭察等官兵

在峯脊之左額森特官兵在峯脊之右因令約齊
同取峯脊上各碉柵又令瑚尼爾圖等攻燒遜克
爾宗左手平田內各寨落富興在右手分頭搶燒
即於二十五日分路攻勦黎明海蘭察泰斐英阿
等從左上攻額森特普爾普海祿等從右上攻同
時並到賊人放鎗滾石悉力抵禦各官兵屢次得
勝之後勇氣倍增業已躍入柵中並直登碉頂將
各寨碉一齊攻克隨令官兵從碉柵之後環燒寨

落時東風大作火勢飛騰所燒碉房計二百餘間
其瑚尼爾圖及富興烏什哈達之兵亦燒燬十餘
處均有殺戮惟時賊人情急聚集二三百人分為
兩股在海蘭察額森特處衝突一次富興處連衝
二次官兵奮勇迎殺殲斃數十餘人餘俱逃散查
遜克爾宗前面碉柵既失寨落又經盡燬此時不
難攻撲但官兵攻燒之際遜克爾宗寨內放鎗甚
緊仰攻必多傷損今於官寨左右接起木城往前

進逼隨將大礮運往轟摧且相機斷其水道則遜克爾宗自歸掌握

同日明亮舒常奏言臣等於攻克木克什山梁礮卡後連日察看賊衆往來絡繹愈聚愈多並於前敵四礮下接山腿之上連築七卡以圖接應若不即時攻克必更增添因將在營官兵酌分五路於二十四日昧爽進攻所有頭敵迎面第一礮先經轟塌半節尚有賊人聚守三寶帶兵立時搶奪隨

即進攻第二碉而賊於濠溝之外立有木柵我兵
幾次扳開木柵與賊刀矛相接其內鎗石交加珠
爾格德進攻東北一面亦復抵死相拒其時和隆
武奎林阿爾都等三路官兵合力並上攻撲第三
第四堅碉其外壘石為卡又有深溝兩道本屬難
攻且下至深溝復由山腰逐步仰登賊人滿布其
上放鎗滾石莫可遮攔幸中間三卡已為屯土各
兵先行佔住奎林和隆武亦即直前搏鬪殺死賊

番甚衆攻至午後見三寶等既難攻破而在後圍
攻碉卡各兵無水濟渴亦形疲乏即所得三卡為
兩邊賊鎗所及難以屯扎當令五路官兵以次撤
回惟已克之頭敵第一碉三寶豎立營盤用礮轟
摧第二三四碉更為切近至永平等所攻西南迤
下山脚賊于左右分路之處擁護石卡密如節比
正面又築大石城一座而自石城以下中間連立
兩碉我兵從旁抄出一面截斷上下救援來路一

面刨挖礮根拋放地雷兩礮內各有數十餘賊非
被大火焚燒即為礮牆壓死其餘或拏或殺無一
得脫者遂乘勝分攻右邊石卡正面石城續來賊
人甚多死力拒守未能攻獲將至天晚亦并撤回
此次官兵俱以所有隘險止在頭敵四礮過此即
屬坦途奮不顧身同時血戰究因賊人到處并衆
聚守以致多有損傷現飭查明數目照例咨部再
奎林髮辮內鎗子穿過頂皮未至透骨現在神色

照常諒可無慮至賊番遭此一番殲戮其數愈少
其胆愈寒此山下通勒烏圍之路非止一處惟有
另圖攻取洗蕩賊巢

同日阿桂豐昇額色布騰巴爾珠爾又奏言查小
金川地方所有零星秋麥前派穆塔爾賡噶等土
領土兵前往收割並令乘機勦殺賊人茲據提督
旺保祿王進祿報稱千總龍廷表同穆塔爾等帶
領土練及鄂克什雜谷瓦寺等土兵並小金川降

番自美諾起身由阿斯統溝內深入搜勦見有賊
番男婦在破碉內藏躲隨令各兵圍住殺賊四名
擒獲男女二十名均奏入

上諭軍機大臣曰阿桂等奏官兵攻取遜克爾宗前面
碉卡殲斃賊衆並燒燬其旁近寨落覽奏實為欣慰
同日明亮奏到稱進攻前敵四碉已取一碉殺賊無
數奎林頂被鎗傷覽之深為廕念奎林平日打仗最
為勇猛今辯頂受傷部位最關緊要即幸而調養無

虞自不便仍帶兵行走惟是明亮處能帶兵之人本屬無多今奎林現須養傷則得力之人更少因思奎林雖不宜勞力而坐守尚可優為莫若令赴富德馬爾邦軍營代富德防守換富德迅至明亮軍營協同進勦富德俟奎林到營後兼呈迅赴宜喜毋稍延緩至此兩路情形阿桂一路自更易於得手並據稱相機斷其水道遜克爾宗自歸掌握所見甚為扼要果爾則官兵乘勝深入更有席捲之勢阿桂一至勒烏

圍則達爾圖之賊必且不攻而潰至於斷賊水道最為上策朕昨年計畫及此曾屢諭將軍等籌辦今阿桂處既用此法明亮何不倣而行之第明亮一路賊人扼守甚堅現在破碉殺賊雖足懾衆賊之胆但此次官員受傷者亦覺稍多明亮於攻勦時倍加慎重方為妥善至穆塔爾等在帛噶爾角克碉一帶搜查賊匪防護割麥畝民既得其糧食復殲擒畝衆男婦所辦甚好功噶爾拉賊雖防守此時諒無能為俟官

兵攻得勒烏圍此等零星賊匪自皆不能存住但現尚有賊一切防守不宜稍有疎畧此乃常青旺保祿等專責伊等均當實心妥辦毋稍玩忽干咎

同日

上諭內閣曰阿桂等奏攻取該布達什諾色溯普山下石碕木城多有出力人員請賞給巴圖魯名號及陞級賞翎等語藍翎侍衛薩爾吉岱帶兵直入賊隊鏖戰殺賊健銳營委署前鋒參領色赫納橫截來援之

賊以致受傷俱屬超衆出力著賞給薩爾吉岱沙木
巴圖魯名號色赫納普爾忠巴圖魯名號仍照例
各賞銀一百兩藍翎侍衛托爾托保潛越賊碉後路
佔據山梁亦屬奮勉著授托爾托保為佐領委署叅
領訥森徹索倫驍騎校委署叅領博爾敦徹吉林披
甲哈布清阿及從噶克土守備阿木布木奮勇殺賊
俱屬可嘉訥森徹阿木布木著賞戴花翎博爾敦徹
哈布清阿賞戴藍翎

同日阿桂豐昇額色布騰巴爾珠爾又奏言查金
川逆酋本為鄰近各土司所切齒況索諾木等因
庇匿僧格桑以致滅亡即竄往他處各土司前車
具在亦斷不敢收留但至力竭勢窮鋌而走險亦
情事所或有自當早為檄示俾各先事預防臣等
謹將

諭旨指示之處詳悉繹出番字發交丹壩梭磨卓克采
從噶克各土司遵照其革布什咱綽斯甲布巴旺

布拉克底凡與賊境毗連者一體飭發令各加意
嚴防不得絲毫疎懈至金川賊酋雖有馬匹而馳
驟非其所長若果騎馬竄逃轉易於擒獲今蒙

睿慮飭令富勒渾等購脩馬匹送至軍營臣等當於滿
州軍倫侍衛章京兵丁內視其材技出衆者酌量
給與以脩臨時追躡奏入

上嘉之

同日文綬奏言現在大兵深入逼近賊人巢穴竊

卡密布均須大礮轟擊近日各路軍營咨調生鉄甚多臣於省城已辦鉄三萬斤陸續運往並將灌縣桃關存貯生鉄星夜運赴楸砭分撥西北兩路應用又於章谷吉地撥鉄一萬斤就近解赴綽斯甲布又將打箭爐雅安等處存鉄趕運章谷轉供馬奈軍營不致遲悞再查上年曾咨陝甘二省購買皮衣一萬件解川嗣因川省先已辦就尚存貯未用昨據阿桂扎稱口外寒冷此項皮衣正屬適

用應即解營奏入

上嘉之

同日劉秉恬奏言臣此次經過革布什咱地方查
詢甲魯一帶路徑多與賊境相通現有革布什咱
土兵脩砌碉卡嚴加防範並有霍耳章谷綽窩等
處土兵協同堵禦至副將鄭國卿帶兵九百餘名
駐守吉地叅將即措升等帶兵六百餘名駐守丹
東兵備道李本從前原駐丹東近亦移駐吉地以

資彈壓至出產礮觔之默滋溝在吉地以東三十
餘里現派將領帶兵防守臣查默滋溝在河之北
而產礮地方在河之南中隔一河且又有數處官
兵層次堵禦賊匪自難偷越但礮觔為打仗所必
須或賊人暗放夾壩潛來偷竊或不肖番民私行
透漏亦難保其必無臣已囑李本等時刻稽查以
防諸弊奏入報

聞

壬辰富德奏言臣等攻取深嘉卜之後河南一帶之沙錫理穆當噶爾山嘴及羊圈等處皆有賊人抗拒經土目頭人前往探覓路徑臣等遂將布拉克底巴旺明正土練及汗牛降番各兵分為五隊攻沙錫理碉卡又令章京舒亮佛喜等帶兵策應而派侍衛阿蘭泰搶佔羊圈河橋利保住用皮船渡河攻打穆當噶爾山卡七月二十四日亥刻各潛至指定地方二十五日丑時突前進攻正在毀

礮殺賊各礮賊人前來救應俱經官兵痛殲是時
阿蘭泰奪佔橋座過河與山頂兵合賊人力不能
支棄礮遁去利保住亦搶奪河東一帶賊卡此次
各路奪取賊礮九座木城一座石卡三十餘座劈
山礮一位并鎗刀鉛藥牛羊糶粃等甚多其滿州
綠營弁兵奮勇殺賊荊州滿兵亦均愧奮出力請
酌與議叙奏入

上諭軍機大臣曰富德鼓勵官兵攻克沙錫理穆當噶

爾礪卡并羊園河橋深為嘉悅着賞給荷包四個舒
亮昨已加恩賞給副都統銜着再賞緞二疋佛喜利
保住等俱着交部議叙

同日

上諭內閣曰此次富德所帶官仗各兵丁及屯土兵練
等奮勇可嘉着照阿桂明亮軍營之例各賞給一月
錢糧至荊州滿兵能知感愧奮不顧身並着加恩一
體賞給一示鼓勵

同日

上諭軍機大臣曰現在大功不日告成其奮勇出力人員各宜獎賞所有需用翎子着發給阿桂一路花翎二十枝藍翎四十枝明亮一路花翎十五枝藍翎三十枝富德一路花翎五枝藍翎十枝以備賞用

癸巳

上諭內閣曰據富德奏庚額特一帶歷次打仗及此次攻打穆當噶爾等處所有隨營革職効力人員總兵

張玉琦副將王承勲俱知感悔奮勉出力張玉琦着
賞給叅將銜王承勲着賞給游擊銜

同日明亮舒常奏言革布什咱頭人土兵再四懇
求隨營効力已據丹津扎布具報派出土兵三百
名由丹東一路前來奏入報

聞

同日富德奏言布拉克底土司安多爾巴旺土婦
伽讓於攻奪穆當噶爾羊圈等處各遣頭人添派

土兵謹力爭先_臣等謹將

恩賞之翎頂銀緞布茶等物酌量賞給奏入報

聞

同日阿桂豐昇額色布騰巴爾珠爾奏言查海蘭
察等官兵在遜克爾宗之左距官寨尚隔深溝現
在拏築木城直抵溝邊與隔岸賊人水碓相對每
日用礮轟擊其額森特等官兵在遜克爾宗之右
亦拏起碓座迤邐進逼是處道路較長官兵雖已

環圍遜克爾宗三面而賊寨石墻高堅殊甚惟寨之西北尚有二碉現又接拏木柵用礮轟摧即可乘機搶佔以截遜克爾宗之後再前月二十八日夜有賊圍劫雲南外委王世貴鍾新所守之卡卡內僅有官兵四十名放鎗抵禦賊人冒死搶進官兵即用短兵接戰經烏什哈達等帶兵往援賊始逃竄官兵追殲甚多查遜克爾宗賊原知難以固守但已計無復之而賊境又隨處有險可恃姑為退

一步且守一步守一日苟延一日之計即前此歷
訊脫出番人皆稱賊目等久已商量偷劫營寨乃
此來不過糾集一百餘人又經官兵殲殪則其伎
倆已可槩見臣等竭立籌辦自能迅抵賊巢奏入
上諭軍機大臣曰賊番勢處窮蹙自必竭力守拒阿桂
所云賊人姑為退一步且守一步守一日苟延一日
之計其說深中賊情然賊人伎倆不過如此官軍屢
勝之後聲勢正盛將士亦倍加奮力無難速成大功

但必須相機妥辦如奪其水卡斷其樵汲賊衆必難
據守其遜克爾宗三面之碕恃險力拒官軍轉不必
過於冒險進撲阿桂本慎重之人恐其急欲成功或
不免稍涉輕率故諭及之然又不可因此過於遲疑
也至外委王世貴鍾新以四十餘兵禦賊百餘守卡
無失甚屬可嘉著阿桂將此二人即從優拔補千總
守卡兵丁亦酌與賞賚其赴援殲殘之烏什哈達普
爾普並著紀錄功績

同日富勒渾郝碩奏言自大板昭至前敵軍營出口之米未能通暢現已飛飭嚴催至後路卧龍關資哩一帶存糧充裕可支分撥且較內地趕運更為便捷臣等即於此項米內撥出數千石並抽調後路人夫數百名由別斯滿一路轉運大板昭交收又分購灰麵十萬斤陸續運濟至北路所需生鉄前後已撥運四五萬斤并查出登春溝內舊存生鉄約十萬斤已飭糧負運出聽軍營調用奏入

報

聞

乙未

上諭軍機大臣曰前阿桂奏番地屆麥熟之時或伏兵截拏其割麥之賊或派兵搶割麥穗誘賊前來乘勢殲勦最為善策今阿桂現在攻圍遜克爾宗該處賊碉雖在山巖之上一面可以進攻其旁近平地種有麥田之處自當遣兵踐棄勿使存留所有附近寨落

並應設法焚燬賊衆雖守堅礪其心必然窘迫亦足
為攻勦揚威助勢阿桂若進抵勒烏圍其地更係平
曠麥畦及寨落必多自應令豐昇額等分頭帶兵將
旁近番人村寨悉行焚燬遇有麥田可資因糧之用
者則取之否則蹂躪燒棄於進攻更為有益即明亮
等將達爾圖山梁全行攻克或沿山前往馬爾邦與
富德夾擊要隘亦當酌用此法

庚子文綬奏言川省各屬新穀次第登場正可及

時採買以濟軍儲再請買米三十萬石以脩軍儲
供支之用至大兵凱旋時回省官兵丁役及善後
駐防兵糧需米亦屬浩繁即或剩有餘糧而節年
借動常監社穀均可將此補還奏入

上從之

辛丑

上諭內閣曰攻勦金川各土兵每多奮勉出力節經交
部議叙議卹該部照例同滿漢各兵覆准具題未免

有需時日現在大功將歲所有賞卹土兵銀兩若不
即時給領將來該兵等各回本境由地方官發交土
司轉給恐不無侵扣滋弊且土兵非滿漢兵丁必須
核對冊籍者可比原可隨時核明先行議覆無容同
案彙題着交該部即查明未經辦出及續經咨到者
即速議覆具奏俾得即時行知軍營令各及早承領
以示鼓勵

同日

上諭軍機大臣曰閱阿桂奏到金川圖內什爾巴當噶及凱立葉其形勢俱在大營之後我兵得勝長驅原不可不將旁近賊人寨落搜勦淨盡以除後患至既得勒烏圍河北河南兩路分進賊中雜徑尚多必須隨地防範勿稍陟大意至明亮若於攻克達爾圖山梁時即沿河趨馬爾邦之後與富德夾擊自可打通馬爾邦合力攻勦噶拉依然如庚額特博堵克舟九寨等處及正地相近之納爾楚獨松等處賊卡尚多

明亮富德必須後路肅清再行進勦方為萬全之策
同日阿桂豐昇額色布騰巴爾珠爾奏言查谷噶
一路進兵係由東迤往西南其凱立葉一路亦向
西南攻進今谷噶官兵已抵遜克爾宗從谷噶了
口前進計七八十里臣等回望凱立葉實在東北
一隅臣等軍營之後其自遜克爾宗至勒烏圍詢
之番人等約計原只有三十餘里但番人所指係
直捷路徑今大兵處處繞越進攻遠近即難定準

至以金川河大局而論總自東北而西南而噶拉
依勒烏圍兩賊巢均在河南馬爾邦則在河北官
兵攻得馬爾邦自須過河進攻噶拉依其明亮現
攻之達爾圖亦在河北彼處官兵若先下至河邊
固須乘船過渡合勦臣等若先破勒烏圍亦必分
兵過河接應宜喜官兵查自勒烏圍至噶拉依陸
路約七十里番人等稱山路多係陡險沿河亦屬
偏仄不如河北一帶道路稍平其大槩情形如此

至臣等一得勒烏圍則進攻噶拉依必當迎刃而解奏入報

聞

同日阿桂豐昇額色布騰巴爾珠爾又奏言此時將屆賊巢醜徒各處死守若得多兵分頭深入收功自更為迅捷目前兵力誠未免畧少但現在近處則無兵可調而調涉遠處又屬鞭長莫及臣等通盤籌畫官兵一抵勒烏圍進搗時凱立葉丹壩

官兵俱可來會而後路無須防守之處均可隨時設法抽撤以資助勦奏入

上嘉之

癸卯明亮舒常奏言達爾山梁陽一面兩山相抱中有賊人水卡往來取水絡繹不絕賊人堵禦甚嚴隨於初七日派兵由西南山側猝然並下搶至水卡賊措手不及驚慌四散為我兵追殺數人賊復擁衆來爭而後隊策應官兵已接踵而至扼住

要隘一面催集土兵從沿山去路直抵水泉地方
當夜連築四碉即派兵拒守於聲執既為聯絡亦
無慮邀截之患其勒烏圍噶拉依兩處巢穴均在
阿桂所攻河南一路臣等由河北進兵即應渡河
往勦兩路中但有一路采進則河南北皆成破竹
之勢其賊境東北一帶山嶺已從中隔斷并可不
攻自潰臣等已札飭藩司顏希深先為預備並令
砍伐竹植存貯搭索橋俟官兵隔河並下即可

用以濟渡速為會合不惟聲息相通於糧運亦可
互為接濟奏入

上諭軍機大臣曰賊人水卡既斷飲汲無資其勢自不
能久於存聚若將東北三碉一併攻克則西南山腿
各碉順勢下壓更易得手據明亮奏預備造船搭橋
料物以便過河會勦若勒烏圍地面寬濶必須多兵
分路圍攻則明亮自當過河合勦若勒烏圍可進之路
無多阿桂豐昇額之兵已足敷用則明亮無庸渡河

自應循山而行潛往馬爾邦之後與富德腹背夾擊
攻開此路即可引進富德會勦噶拉依賊巢逆酋兩
面受攻自更應接不暇於掃穴擒渠尤可迅速藏事
著明亮於全得達爾圖時即札知阿桂妥為商酌行
之

同日五岱奏言初一日夜有賊侵擾達爾札克經
後山駐守之侍衛圖桑阿等帶兵追殺賊人連衝
三次復短兵接戰賊始敗逃奪獲鎗刀等件奏入

上嘉之

戊申富勒渾郝碩奏言查楸砭一帶積米無多復
飭雅安縣辦米三千石即由木坪一路長運達木
巴宗併飭附近之木坪天全州蘆山縣辦米二千
石即由木坪趕運其灌縣出口之米已飭藩司錢
鋆親往督催並專委成都府知府德克進布督同
各屬星夜雇騾赴灌濟運


同日鄂寶顏希深奏言達爾圖新設臺站由南北

兩路解送人夫統計三千餘名足敷撥用其管站之員覺木交現有知縣一員俟大兵移營前進即令帶人夫添安新站臣鄂寶即於十四日前赴卓克采一帶督催糧運均奏入

上諭軍機大臣曰據富勒渾所奏糧運情節實不免于遲悞此次糧運之不能接濟其故自在楸砥而楸砥之所以玩延則由派劉秉恬前往正地其專辦之道員查禮又往郭羅克查辦劫竊案件遂致該處糧運

日漸因循前經富勒渾奏令接辦之知府張三禮洪
蕙及道員呂元亮所司何事以致遲延若此著富勒
渾郝碩迅速確查叅奏一面將貽誤之員革職枷號
示儆其省城不能多解供運錢鑒實難辭咎富勒渾
文綬速即實力督催以期迅濟毋再遲延鄂寶親赴
卓克采催運須實力為之宜喜軍糧較楸砭一路稍
為充裕然亦須內地陸續接濟方可無誤並着文綬
留心催辦不能及早籌辦咎亦均無可諉實自為之

宜喜軍糧稍為充裕然亦須內地陸續接濟並著文
綏留心催辦



平定兩金川方畧卷一百三

欽定四庫全書

史部
平定兩金川方略卷一百
五四

員外郎_臣顧宗泰覆勘

總校官原任侍講_臣王燕緒

欽定四庫全書

平定兩金川方略卷一百四

八月庚戌阿睦豐昇額色布騰巴爾珠爾奏言臣

等用礮轟擊遜克爾索戰礮東面上截礮牆業經

轟塌並將礮門摧破賊人於礮寨之內復挖地坑

以為藏身死守之計雖督兵力撲亦可望其得手

尚恐多至損傷其西北寨落連掣木柵已將遜克

爾宗隔斷而迤西尚有兩礮是以賊人後路未能

盡絕臣等因令額森特等督率官兵砍伐木植挈

柵進逼復趕鑄大礮運往轟擊至衝天礮鎔鑄已就礮車並已造成試放有準

同日阿桂豐昇額色布騰巴爾珠爾又奏言官兵環攻遜克爾宗賊人力竭勢窮不時跪喊求饒臣

等屢遣弁兵呵斥十五日金川頭人綽窩斯甲將僧格桑屍匣刨起呈獻并將僧格桑之妾側累及小金川頭人蒙固阿什咱阿拉一同獻出並稱七

圖安堵爾現在患病隨後亦即拏獻_臣等將側累

蒙固阿什咱阿拉并綽窩斯甲一併拘留其僧格

桑屍匣訊係在遜克爾宗後石窖內起出當將屍

身令側累蒙固阿什咱阿拉及認識之穆塔爾等

一同驗視衆供俱屬相符已令割取首級交文綬

暫存省城俟拏獲索諾木弟兄及大頭人獻俘時

一併獻馘_臣等揆度賊情不過暫為安頓之計且

仍期冀徵倖完事現在官兵照常趕拏木柵且緊

轟大礮以期迅速果入斷不致稍有稽滯至七圖
安堵爾已令跟隨綽窩斯甲散番前往催取若金
川大頭人一同前往并可設法擒戮

同日阿桂豐昇額色布騰巴爾珠爾又奏言指日
攻克遜克爾宗即應從日爾巴當噶發兵搶佔一
得此處便可上接凱立葉之兵會同下壓噶爾丹
喇嘛寺且大兵從此順梁而下一至河邊則賊酋
從河南往丹壩之路已斷而明亮等又從達爾圖

山梁下至河邊則賊酋從河北往丹壩之路亦斷
現在丹壩一路漢土官兵幾及二千以之攻勦即
為不足以之堵禦實為有餘況屆時明亮之兵應
當循河而進出馬爾邦庚額特之後臣等一路之
兵除緊要後路尚須節節留防並須分兵將賊境
東北各寨逐一掃除所需兵力已為不少若再令
五岱之兵帶往丹壩會同五福駐守則於進剿賊
巢兵力轉致不敷且各土司凜奉

諭旨預派能事頭人於各要隘列兵防守希圖立功邀賞若逆酋等出其境內必轉以為竒貨可居自不肯任其遁逃藏匿似可不致疎漏均奏入

上諭軍機大臣曰阿桂等籌辦遜克爾宗築柵鑄礮日漸就緒自可剋期集事現屆大功將成倍宜慎重阿桂不欲令官兵輕率撲礮所見極是至所奏金川賊人將僧格桑屍身及側累等呈獻到營阿桂等僅與拘留仍照舊攻打不稍弛懈所見尤是側累等固應

解京嚴訊但不過解審之犯止應選派妥幹員弁嚴
行管押毋任疎脫不得謂之獻俘直待擒獲索諾木
兄弟方可行獻俘之典至僧格桑之妾雖已獻出而
其妻則不肯同獻自係索諾木因其親姊之故若是
則金川所獻仍屬賊中無關緊要之人其肺肝自不
能掩阿桂當時何不以此語詰之乎又據奏五岱在
阿桂處既需留辦分勦分防之用即毋庸前赴丹壩
著阿桂檄知五福妥為防範至各土司見金川滅亡

在卽欲借此除害並立功邀賞誠心歸順均不敢疎縱似屬可信攻破賊巢時逆酋諒無從免脫亦不虞其自戕惟丹巴沃咱爾狡惡異常恐未必肯束手就縛務必設法生致檻送京師

同日陳輝祖奏言楚省赴川軍士應須皮衣禦寒并添補腰刀鋤斧帳房等項請借撥一季俸餉向解川製備散給奏入

上諭軍機大臣曰川省軍營如雲貴陝甘各省調用之

兵甚多且較楚兵更久其衣履刀杖歷來作何添補今陳輝祖專為楚兵籌計而各省兵丁同在行間見楚兵獨蒙優恤相形之下未免心懈且于國家一視同仁之義亦未得其平着阿桂即速查明各路軍營舊辦章程如原係各省撥辦陳輝祖亦照他省之例自可聽其撥解如各省俱未辦及而此項裝械必不可少則應一體辦給行知文綬購辦

臣等謹按各省官兵從征遠調備具器械整飭行李所以使之專心一力誠行軍之要務也陳

輝祖以楚兵赴調請給資裝我

皇上睿謨廣運一視同仁念及雲貴陝甘調集諸軍為

時更久即命將軍覈實一體優頒斯誠

丕冒生成無微不至宜乎軍中聞

命挾纊知溫無不踴躍爭先勝氣百倍矣

同日

上諭軍機大臣曰逆酋索諾木莎羅奔弟兄及助逆之大頭目如丹巴沃咱爾蒙固阿什咱阿拉七圖安堵

爾等罪大惡極神人共憤就擒之日自應解京誅磔
以快萬姓觀瞻其餘逆番頭目人等著即就軍前凌
遲正法以釋我軍憤恨且使各土司番夷咸知炯戒
九月辛亥明亮舒常奏言查相連俄坡之阿克什
前此奎林攻奪山頂一碕因察看情形其下左右
即係兩山腿迴抱深溝箐林蒙密前途恐有隔碍
是以暫捨不攻現詢之綽斯甲布頭人薩木卡爾
稱穿過箐林惟溝口有戰碕二座過此以往即係

沿江大路其間木闌曲雙克馬斯達等處寨落甚多為賊境人戶最多之處即索諾木現住納木迪官寨亦在斯達左側由此未嘗不可擒獲等語臣等正在籌辦間恭奉

諭旨俄坡一帶亦須將所有賊碉用砲轟摧隨即選滿漢屯土各兵於十六日進攻將近黎明起大霧迷漫之候分作四股並下和隆武先將第一碉攻克其時兵丁所向克捷已足以壯軍威而破賊胆矣

其第二碉則派珠爾格德進攻第三碉則派三寶其旁尚有大石卡一座則派阿爾都進攻并力齊進賊於碉後地窖聚守猝然驚覺鎗石皆不及施棄碉逃逸正當乘勝追殺而各路救援之賊以為官兵全力在木克什山梁攻打轉於西南山腿之上撲近營盤希圖乘虛而入官兵俱用排鎗迎擊斃賊二十餘名賊又旋於木克什山腿從旁直上其時綽斯甲布草布什咱兩處土兵復又繞出其

後賊見來路將斷捨死搏戰而索倫吉林官兵注
矢團射滾崖落箐者無數餘即四散奔竄又經吉
林領催烏達遜索倫馬甲喀爾泰空藍翎額魯特
達瓦沖入賊隊奮力窮追各斃賊番數名同時西
南甲索一路及東北沙壩山後俱有賊人前來掣
我兵勢各路防守甚嚴不為少動現在所得礮卡
俱已接拏木柵此後尚有三礮仍用大礮逼近轟
摧數日內即可全克奏入

上諭軍機大臣曰此次攻勦碉卡和隆武首先攻克珠爾格德三寶阿爾都等亦各奮勉出力甚屬可嘉而滿洲吉林索倫官兵聚射賊衆矢無虛發甚為得力并著明亮等存記檔案俟達爾圖一路全行攻得交部一併議叙其在木克什山腿繞截賊衆之綽斯甲布草布什咱土兵亦著明亮量為獎賞以示鼓勵又昨據阿桂奏綽窩斯甲供稱七圖安堵爾因患病行走稍遲隨後也就出來阿桂因計及俟七圖安堵爾

出來時其金川大頭人丹巴沃咱爾山塔爾薩木坦當噶拉阿納木等若與同來能設法生擒固善否則伏兵立時殺死等語若果能如阿桂所計自是極好機會但七圖安堵爾乃小金川賊目中之最黠者又已降順金川為其出力索諾木未必肯將其獻出昨見及於此曾經諭知阿桂今復思賊衆狡惡異常恐其借擒獻賊目為名別藏詭計或丹巴沃咱爾同來至營門時誑稱有面稟之語將軍叅贊即未必輕與

相見或海蘭察額森特等出至營外誤為誘去是賊
未能入我羅網而我領隊大臣轉致墮其術中實屬
不成事體在阿桂閱歷年久自能隨事審慎未必為
賊所愚但現在大功將成諸事倍宜妥善偶爾籌及
此事實深意外之虞相隔將及萬里應諭之語不能
一時即達中夜幾為廢寢阿桂等當善體朕心慎重
妥為之不特此也我兵即日乘勝進勦勒烏圍噶拉
依兩處賊巢逆酋等窘迫出降亦所有之事然賊

衆或惶懼無能哀求遁死或鋌而走險包藏禍心皆不可知古語云受降如受敵各路將軍遇有此等情事並當加倍留神勿稍涉大意方為萬全之道至明亮攻得達爾圖山梁以來聞丹巴沃咱爾在彼抵拒其人實猾賊之尤頗有惡智今觀達爾圖賊衆伺隙潛襲或者丹巴沃咱爾果在彼處明亮於攻勦時務須隨處留心切勿輕敵至明亮此次派出帶兵攻碉之領隊大臣未及奎林想因其創傷尚未全愈前據

奏傷處已經結痂自可即就平復甚為厯念可附便
即行奏聞至阿桂所奏賊中獻出之側累蒙古阿什
咱阿拉俱已訊供而綽窩斯甲獨未訊及不知何故
該犯係金川頭人其於賊中情事知之尤應真切如
此時尚未起解即應嚴加訊鞠倘能訊得賊中虛實
或有應隨宜防備之處於軍務自為有益著阿桂即
行訊明覆奏

壬子五福奏言不日大兵深入令防賊匪逃竄

臣

惟有督率官兵晝夜嚴密防範俟五岱帶兵來到丹壩臣將卡隘地方情形備細陳明協同慎籌辦理斷不敢稍存推諉奏入

上諭軍機大臣曰五福奏俟五岱帶兵到丹壩協同籌辦一摺於朕前旨未能領會前令五岱帶兵赴丹壩之說原指阿桂攻破遜克爾宗後令豐昇額帶兵數千往取日爾巴當噶即往凱立葉與五岱夾攻盡得其地再令五岱前赴丹壩並非此時即令前往也又

昨據阿桂奏丹壩一路漢土官兵幾及二千堵禦實屬有餘若復令五岱之兵帶往丹壩會同五岱駐守於進剿兵力轉致不敷等語五岱在阿桂處既須留備分勦分防之用自無前赴丹壩之理已諭知五岱並令阿桂即行檄知五福責令專辦矣丹壩一路既有兵二千足資堵禦而五福身係滿洲番衆自不敢輕視且駐彼已逾一載於該土司等亦應相習土司見大功將成無不思各建功績是堵禦逆酋之事尚

非難辦現在阿桂攻圍遜克爾宗尅期可得明亮又
攻獲俄坡之木克什碉卡兩路俱可乘勝迅入直壓
勒烏圍昨據阿桂奏稱官兵進剿勒烏圍阿桂在河
南明亮在河北兩路俱有重兵攔阻賊酋無從竄逸
所言未嘗無理但逆酋等窘迫求生之時或竟改裝
易貌隻身由微徑潛逃此皆賊智所應有五福斷不
可稍涉大意致有疎虞

丁巳阿桂豐昇額色布騰巴爾珠爾奏言

臣等所

擎木柵已抄過遜克爾宗官寨之西但該處高砌
層疊間以深溝勢難接擎前進尚未能斷其往來
之路而遜克爾宗官寨及左手水碉臣等雖督令
官兵一俟霧雨稍開即行轟打但霧雨時多開霽
時少賊人仍復隨塌隨修二十二日雲開霧散後
用礮力轟見賊碉北面已漸坍塌臣等因於二十
四日子刻派令海蘭察額森特等督兵進發官兵
營壘本距賊碉甚近各兵踴躍奮迅直至碉寨之

下或攜帶木梯板上寨牆或折開缺口往內衝進
並撩入火彈而賊人抵禦鎗石甚緊官兵又從坍
缺礮牆乘之以入并拔取礮內之梯以斷賊人上
下而土鬆石動官兵不能著脚賊人轉於礮底挖
有地窖藏身即於地窖內攢鎗上打其在礮頂之
賊拋石下擲勢如風雨且寨內窄狹多兵難於施
展自寅至卯賊人抵死不動恐致多有傷損當將
官兵徐徐撤下查賊人實因滅亡在即步步為死

守之計其醜類較前更多其預備更為嚴密臣等不勝焦急憤恨雖番土秋雨本多然以前兩年例之旬日之間即當漸止今二十五日仍復雨霧甚大臣等晝夜轟推使其無從修補預備精健兵丁視其稍有躲避情形突然搶撲諒能得手

同日阿桂豐昇額色布騰巴爾珠爾奏言本月十五日金川賊酋已將僧格桑尸首及其小女人側累并大頭人蒙固阿什咱阿拉送出旋於十七日

酉刻賊來卡外叫稱復將七圖安堵爾送出懇請
查收并求停止鎗礮賞給執照臣等先將七圖安
堵爾等收禁隨令海蘭察額森特等斥以汝索諾
木等既云知罪乃僅送兩三人並未將小金川各
頭人百姓全數獻出且索諾木及莎羅奔均未親
至營盤叩見將軍即求執照以為完事似此狡惡
實不值再與爾等說話賊等見海蘭察額森特動
怒即畏懼叩頭而退臣等當將拘留之頭人綽窩

斯甲散番四名一併嚴拏並將七圖安堵爾教唆
僧格桑吞併鄂克什抗拒大兵及上年令伊姪雅
噶爾斯甲布勾通小金川番人滋擾大兵後路且
因雍中朋有心投順即行殺害各情逐加詰訊伊
俱含糊隱約未肯傾吐實情若加以刑求本無難
於得實但該頭人實係作惡渠魁現稱患病若遽
用刑致斃轉不足以明正典刑且進京之後仍有
蒙古阿什咱阿拉為之質証斷不能稍為抵飾自

可明昭罪狀加之誅磔以彰

國憲而快人心至側累七圖安堵爾蒙固阿什咱阿
拉皆係小金川緊要之人即綽窩斯甲亦係索諾
木等伴黨新放頭人均應一體檻送京城以備訊
辦臣等即令

乾清門侍衛阿彌達同前鋒章京寧泰護軍校查綸
布等並屯練通事一名於二十五日押解起程並
屬該員等沿途防範毋致疎虞其僧格桑首級函

交文綬存貯省城俟擒獲索諾木莎羅奔兄弟時
俘馘同獻查七圖安堵爾等本係小金川第一助
惡大頭人生致京師明彰顯戮固可稍快人心但
於剿除一事究屬無關輕重臣等第以竄在金川
之小金川頭人尚有數人番衆尚有數百人賊酋
等既將僧格桑毒死而最効力於金川之七圖安
堵爾復先送出則此外存留之頭目番衆皆生疑
懼非獨不肯更為盡力必尚有投出中變之事正

可乘機攻進是賊酋雖逞其狡計而將計就計以破其謀於進勦事機轉不無裨益且現在遜克爾宗臣等竭力籌辦即期克獲從此奮力進攻賊人自成土崩瓦解之局矣

同日阿桂豐昇額色布騰巴爾珠爾又奏言番地跬步皆山可耕之地本少是以一家所種不足供一家之食必得酒糟菽殼及圓眼等物藉以糊口始畧敷一歲之需臣等此路自谷噶前進幾及百

里均係崇山直至遜克爾宗相近始有田地然尚
磽确居多計番人所種秋麥不過數頃經我兵焚
燒搶割現已毫無所有但聞番地莊稼現俱收割
臣等此後攻勦所至遇有大寨存種糧石自當查
點入官以為因糧於敵之計至臣等前奏攻取焚
燒遜克爾宗前而左右碉寨一摺內曾有自色泐
普山腿以至遜克爾宗中間一道峯脊上賊人又
豎立木柵石碉之語蓋因色泐普上承羅博瓦日

瓦卡爾迤邐至遜克爾宗本屬一道山梁逐步漸
低但自色溯普迤邐而下尚有筆朗納克及該筆
達烏兩處從前因未知其名統指為色溯普山腿
而自該筆達烏迤邐斜下與該布達什挪山腿腹
成一了口過此了口岡脊上又有扎木咱克密里
阿岳拉瑪格羅等碉柵平房再過此始為遜克爾
宗前此七月十七日額森特帶兵從右手抄進色
溯普前面賊碉之後佔據筆朗納克及該筆退烏

地方而海蘭察帶兵續進併從額森特佔據處所
往截該布達什挪之後路非但色溯普山腿上木
城碉卡盡行克獲焚燒其了口外緊要接一岡脊
其上所扎木咱克密里阿岳拉瑪格羅等處碉柵
寨落亦於上十五等日繞攻燒燬令將各碉寨地
名逐一詢出分段繪圖呈

御覽均奏入

上諭軍機大臣曰阿桂等奏攻打遜克爾宗賊寨設法

進取情形一摺已於摺內批示據稱海蘭察額森特等所帶官兵直至賊碉之下或攜帶木梯板上寨牆或折開缺口往內衝進又從坍塌碉牆上乘之而入並將碉內之梯用力拔出以斷賊人上下等語雖點賊於地窖深藏未能攻得而官兵如此奮勇實屬可嘉此等出力者係屬何人阿桂等俱應查明或即行量予獎賞或記名一併優叙俾衆兵益知鼓勵至所稱恐官兵或有損傷即令徐徐撤下所辦甚是大功

將成諸事倍宜慎重現在官兵勇銳倍常礮力亦甚
威猛自可剋期攻克惟當相機而進以期萬全又據
稱十九至二十二雪雨連縣實覺可恨阿桂於二十
三晴霽之後即於是夜派兵進攻可見阿桂等及諸
將領亦不肯稍懈看來番地氣候春秋雨雪每甚惟
冬令晴日較多章嘉胡土克圖曾言及之前歲攻得
美諾等處及昨歲收復小金川皆係冬月成功已可
概見阿桂等尤當努力為之若於長至前集勲歲事

亦不為遲也至另摺奏賊人於十七日將七圖安堵
爾送出即同緯寓斯甲一併拘拏訊供等語七圖安
堵爾降順索諾木為之出力意賊酋未必真心捨獻
今竟將其獻出則賊情之窘迫可知但據七圖安堵
爾供稱聽見大頭人說如今格魯瓦覺宜喜兩路官
兵來得狠緊怕我們攔不住從前大兵進來原為小
金川土司令將僧格桑屍身及其妾側累并大頭人
七圖安堵爾等送出想來可以完事緯斯甲布布

拉克底巴旺三雜谷如今雖打得利害但都是我們親戚若是大兵出去過幾年還可相好等語賊人狡黠可恨在此而其糊塗不知死活亦在此今官兵攻勦金川所有險隘已得十之八九阿桂等及諸將領自無不思速建鴻勳慰朕懸注諒斷不肯因賊酋懇求稍存游移姑息之見第恐綠營官兵悉皆庸識淺見且從征畧久急圖休息者多一聞賊酋獻屍求降之言難保心不為稍惑阿桂等當通行詳諭衆官兵等

以各路大軍乘勝深入自可直薄賊巢指日成功爾等俱可仰邀優叙得官受賞況國家費如許力量以期永靖邊圉豈可虧於一簣若此時准其求降完事則禍根不除仍貽後患且賊酋等明言大兵出去過幾年各處土司還可相好則其野性難馴更覺顯然若不徹底妥辦則大兵一撤數年後賊人故智復萌又將聯絡諸番強吞弱併抗逆鴟張勢不能再興師問罪仍需爾等宣力戎行與其數年之後重勞跋

涉何如就將成之績勉力圖功速膺懋賞乎如此明白告戒衆官兵當益加鼓舞自効不為浮言所惑矣又據七圖安堵爾供土司今春因百姓沒得喫也借出一兩背米如今莊稼收了土司們就要追還又要他們利息所以百姓們心腸愈淡等語又綽窩斯甲供土司怕百姓們心變叫齊各處寨首說大兵打破了地方不論土司頭人與百姓都不饒的須大家出力看守地方等語可見金川番衆其心未嘗不動前

曾諭令阿桂於進兵攻勦時一面傳布號令通諭諸番使皆知悉如有深知順逆之理不為賊酋死守望風投降者仍得免死安居但不可仍令其居住本地若能併將土司頭人擒獻者必加重賞倘迷而不悟直待攻破碉卡雖降亦不饒恕此時以此傳播正當其可且因賊酋有叮嚀百姓之言切為曉諭更屬將計就計易於引動著阿桂明亮等共知此意於攻勦賊碉時令土兵等一體傳告使衆番共有見聞俾懈

其死守之心各懷求生之念亦因勢利導之一法也
再閱阿桂進到圖內密里阿岳以下官兵木城已過
遜克爾宗之前而所得之格魯瓦覺亦在遜克爾宗
之前是賊人來路難截斷已於圖內用硃筆圈誌若
從官兵木城至當噶克一帶圈誌處所堵截其往來
之路遜克爾宗賊衆自斷不能久存著將此圖發與
阿桂若此旨到時尚未攻得阿桂務當悉心妥酌為
之

同日阿桂豐昇額色布騰巴爾珠爾又奏言本月十八日頭等侍衛德保同欽天監監副傅作霖來抵大營據稱

皇上因送川之衝天礮位恐前此所派欽天監官員測量未能精細是以復派傅作霖來營指示點放並派德保照看前來查衝天礮位自鑄成以來屢經演放所落礮子已不出方圖十丈之外而十八日午後適有數刻之晴臣等又同德保傅作霖等前

往驗放據傳作霖稱靈臺郎等所測高下遠近之數已為有準今復按照舊法對準度數施放更可無悞臣等連試數礮亦均在十丈之內現在遜克爾宗之賊盡力死守於此驗放打進或可轟斃賊人但施於官兵已抵碉寨之時則礮子墜落之遠近炸裂之遲速稍有參差偏倚轉為有碍臣等於二十三日派兵預備一面將衝天礮運往施放第一礮子落於賊寨牆根第二礮正墜寨牆之內看

來賊人必有傷斃至第三礮亦經打進但礮子為
數有限此時自宜愛惜留俟進攻勒烏圍噶拉依
巢穴時寨落既寬賊番尤衆施放必更為得力奏
入

上是之

同日富勒渾郝碩奏言西路自梭洛拍古至軍營
各站存糧二千餘石又據寧遠府知府盛英稟稱
北路宜喜各站存糧三千餘石

臣等核計兩路軍

糧目下雖敷支放但計日授食不過僅敷半月之需必須後運源源輻輳方資接濟現接文綬咨稱騾運之外又派省城附近各州縣雇夫一萬名赴灌協運並劉秉恬咨稱親赴維州保縣一帶查催似此內外加緊趕辦騾運夫運合力轉輸軍米自可不致貽悞奏入

上諭軍機大臣曰據富勒渾等奏現在核計北路軍糧自可足敷應用惟西路糧運前因揪砥至大板昭一

帶已露遲誤情形節經傳諭富勒渾文綬等迅速設法趕運昨文綬奏到據催糧道府稟報近來每日運出挑關米數總有一千餘石等語果能似此運供無間軍糈自不至復虞拮据但不得稍有粉飾以致空言無濟今日據阿桂奏現在進攻遜克爾宗計日即可攻克當此乘勝深入之時軍食尤關緊要著再傳富勒渾文綬等時刻運籌實力催趲並飭口內口外各委員分段督催上緊輓送務期源源接濟以資

集事若稍有延緩則貽誤軍需恐富勒渾文綬不能當此重譴至軍需銀兩昨據文綬奏報摺內存庫尚有一百四十六萬餘兩核計各省未經解到銀數尚有三百七十餘萬可用至十一月底彼時大勲諒已告成即或大兵凱旋起程畧需時日尚有應用軍需之處文綬即速預為籌畫不妨先期奏請再撥二三百萬兩以期寬裕妥善

平定兩金川方畧卷一百四

欽定四庫全書

平定兩金川方略卷一百五

九月庚申明亮舒常奏言木克什山腿下盡之處
尚有兩碉其後復起一碉則上與甲索相通此各
碉內賊雖死力拒守而我兵逐步下逼接拏木柵
本不難於尅期攻取無如連旬雨雪無間朝暮遍
山泥濘下坡尤難措足今先用大礮轟摧已見碉
牆逐漸殘破待至二十四日午後西風忽起天氣

稍晴隨即密調兵衆分爲三股於二十五日子刻
挨次進發土兵於黑暗之中先已偷近賊碕將及
黎明鎗聲並起和隆武三寶帶兵向下圍裏兩碕
詎意正當緊要之時猛雨大作斜坡陡路其滑如
油索倫吉林兵丁畧一舉步即全身溜跌不能自
主而賊衆藏身碕內以逸待勞轉得施其鎗石其
在後一碕雖經土兵攻奪而甲索下援之賊蟻附
而來前後受敵勢雖存住現在仍用大礮儘力攻

擊俟兩三日稍晴統兵攻撲定可得手先是

臣等

於東北西南兩山腿相抱中間將賊人水卡設碉
佔據不知其近日更從何處取汲但屢向水卡窺
探料其必欲復來爭奪因派三寶珠爾格德阿蘭
保等帶兵坡坳設伏以待二十一日辰刻霧雨迷
漫有賊二百餘人分為兩路抄至碉旁守碉土兵
發鎗拒住伏兵聞聲踵至四面圍射三寶阿蘭保所
帶箭枝俱為用盡賊人倉皇逃遁遺棄尸身尚有

四具其時東北山腿復有賊百餘自上壓下適遇
珠爾格德統衆下來接應從旁截出乘勢尾追以
一人深入賊中力殺三人徐徐退回其勇敢氣象
為衆領隊所目覩臣等謹遵

皇上備賞藍翎即給與以示鼓勵計此數日以來雖未
進據地方然殲戮賊番甚衆我兵即間有損傷為數
無多且均以為蕩平巢穴指顧可期無不人思
自奮奏入

上諭軍機大臣曰明亮等奏進攻木克什山腿兩碉正當圍裹緊要之時雨風大作甚為可恨看此情形賊中必有善用札達者但此等究屬邪法不能勝正將軍等總以鎮靜處之並曉諭將佐弁兵不必視以為事其術自然無所施所謂見怪不怪其怪自敗也若風雨之故由山神所為亦屬非理朕奉

天承運為天下共主茲以金川逆酋負恩反噬罪大惡極為

覆載所不容不得已命將申討師直而理正且所至之地
諭令將軍等致祭祀賽山神有知自應効靈助順早
佑歲功以膺國家秩祀若轉袒護逆酋甘為邪術驅
遣妄行雨雪即屬違理悖常必干

天譴昔韓愈以一州刺史尚能正辭發弩驅除鱷魚矧將
軍奉天子命征勦不庭豈山神所得而相抗乎將軍
等適遇非時雨雪即當視其來處用火礮迎擊縱有
邪魔亦當退却此亦代

天宣化之正道也至番地常時氣候大約冬令晴日居多
前歲昨歲屢次獲勝皆以冬月計以旨到軍營已是
九月下旬轉瞬初冬天晴氣煦定能掃穴擒渠尅日
奏績而將軍等亦當勉力為之

臣等謹案用兵者道勝為上威勝次之力勝又
次之明亮等進攻木克什山腿兩碉正當合圍
風雨大作逆酋善用札達之術自以為得計矣
豈知背道亂常上干

天譴積惡降殃理無或爽我

卷一百五

皇上洞察情偽飭將軍等鎮靜蓋以見怪勿怪使彼詭
道邪術俱無所施正如太陽曜空氣翳自散卒
使賊人坐縛大功底成洵乎邪不勝正不特金
川為然實千古用兵之鴻鑒也

壬戌劉秉恬奏言八月十八日楸砥驪運到米計
一百八十石合之滾運商運共有米四百餘石較
前似稍有起色不意此後大雨連綿查十九二十

每日所到之米總不過一百餘石臣恐前途或有
坍塌阻滯遂於二十一日親往查看並迎催在途
之米二十五日亥刻至楸砭是日雨勢倍大臣查
此時日內二十一至二十五日運交楸砭過站之
米共有二千五百餘石此內滾運較多驟運次之
商運又次之除分運綽斯甲布數百石外五日內
共運大板昭米二千一百餘石並將先已辦備之
羊隻一併解往軍營聊可以資接濟但臣自維州

回時查看沿途續來之米仍復無多昨據建昌道
白瀛稟稱兩處支領及軍營兵夫每日需米三百
七八十石是合之大板昭及日爾拉一路臺站必
得米五六百石方可敷用目下軍營及附近各站
聚存之糧業已無多惟特每日運到之米以為接
濟臣計楸砭日內運往之數每日可有四百餘石
軍營兵丁日衆則糧宜日增今計運往得有四
百餘石是所缺者尚有一二百石總之川省邈外道

路崎嶇軍糧輓幹維艱必須預為籌畫早為布置
方可期有盈無絀日內秋雨連綿日爾拉一帶業
已積雪雜谷腦等處偏橋又恐或有坍塌臣常不
時上下查勘往返照料庶冀糧運速而軍食足矣
同日鄂寶奏言臣前赴卓克米一帶督催趕運沿
途挨查各站及大營存貯軍糧統有三千餘石約
數十餘日支食此路站遠途長若續來之米源源
而來自可無虞缺乏雖屢經咨明督臣文綬富勒

渾作速趕運並一面嚴邀軍需局司道上緊要辦
一面牌傳沿途各站並委員沿路趕催隨到隨運
毋稍停積而官商長運米石逐日到站者僅止數
十石多亦不過百餘石且滾運一項半月以來顆
粒全無即以現在糧石撥補供支轉瞬亦將告少
當此乘勢深入之時儻有缺乏關係實非淺鮮查
內地派運北路米石數非不充無如派多運少竟
至有名無實據此情形深為可慮伏乞

皇上勅下督臣文綬富勒渾嚴飭承辦各員務須認真
趕辦源源運出以資接濟均奏入

上諭軍機大臣曰劉秉恬奏楸砭日內所運米數到營
不過二百餘石軍糧關係緊要現在正當乘勢深入
之時更須源源接濟且自上年以來轉運寬裕並無
短缺乃迄今忽爾竭蹶時形殊不可解况文綬前日
奏到以為每日可得米千石而劉秉恬所奏又屬不
符是文綬所奏仍係空言不信該督等覩此情形豈

竟毫無著急安速督催目今功屆告成若因軍糧不足稍有稽遲該督等能當貽誤軍糧重罪乎著傳令富勒渾文綬等上緊妥籌速為起運毋致稍有缺誤至沿途夫食固所必需然較之軍中究屬有間該督等亦當設法樽節酌辦將現有之米儘供軍營食用一面加緊接運以濟軍糈方為妥善又據鄂寶奏稱官商長運米石逐日到站者僅止數十石及百餘石滾運一項半月以來顆粒全無至南路運到者三千餘

石該督等所辦何事著富勒渾文綬詳查何站發運遲誤一面據實奏一面嚴催輓運毋得稍有分毫迴護

甲子文綬奏言查西路軍糧因八月初旬長運米石未能迅速到站臣恐稍有遲悞即同藩司錢鏊商酌飭令成資錦三府州屬戶覓騾馬二三千匹迅赴流縣運過桃關之米每日共有一千餘石現大兵乘勢深入趕運尤宜充裕此時若照舊例招

長運則商人散居各府州屬僱夫承運其應募既
先後不齊臣思向來辦運軍糧中以商運所需即
令偏夫滾運可以尅期必到查商運腳價自省致
楸砭每石例給銀七兩若叫夫滾運每石用夫二
名例給工價口糧安家三項自省至楸砭合計每
石所用不過六兩有餘加以夫頭押差及站長路
遠之處量添夫力一切雜貨其所費亦殊無多是
商運腳價不謂省于夫價矣今以每石用夫二名

計之適合商運每石七兩之數是人其招至承運
緩急不足深持自不如就近添戶人夫可以尅期
直達且就適滾二運兩相比較計於帑項並無增
添而軍營儲峙立見充盈則自灌縣至楸砥令應
另行役站每日每站務令運足米五百石其站夫
口糧亦即案數添運不令支食正項致缺五百石
之數臣現在將潼順等屬應辦米六百石滾運以
進加以長運騾運及舊站滾運每石到楸砥者提

可得一千二三百石以供二路軍營兵食及分運
卓克采一帶並沿添站夫口糧已屬有盈無絀奏入
上諭軍機大臣曰昨據劉秉恬奏西北西路官兵站夫
每日運出桃關之糧必須有千餘石方敷支食於軍
務甚有關係因諭令富勒渾文綬等加緊起運務要
源源接濟令文綬奏酌添站夫滾運所用與商運相
同所辦甚好自應照此辦理但不知是否實在情形
著傳諭劉秉恬查明八月十三日其運出桃關之米

於何日運到楸砥綜計可得若干與文綬所奏之言
相合即行奏聞又行據鄂寶奏請將楸砥之米分撥
卓克采運赴北路等語彼時以楸砥所辦糧運尚且
不敷焉能又行分撥事屬難行今運至楸砥之米如
果每日可得一千二三百石已屬寬裕即劉秉恬以
此所奏每日所須一千餘石之數原係合卓克采一
路通計在內自應仍令分運卓克采以濟宜喜軍營
之用著劉秉恬核實查明一面知會文綬鄂寶酌量

妥辦一面奏聞

乙丑阿桂豐昇額色布騰巴爾珠爾奏言臣等進
攻遜克爾宗水碓二十五日以後又復雨雪連綿
臣等於雨雪之後趕鑄三千餘斤大礮至二十九
日鑄成而天氣亦已開霽移往連夜以擊兩日間
水碓半截塌臣等本先派定精銳兵丁以備不時
搶撲至初二日晚即派海蘭察額森特等分兵兩
股突然搶上賊人措手不及官兵衝入碓內皆奮

勇砍殺殲斃二三十人遂乘勢直入而賊番於穴
內四回放鎗如雨抵禦甚緊未能即克查是礮賊
人所資飲汲已經攻取雖官寨西路賊向有取水
之處而往來紆遠其情必更窘迫但官兵在山峯
突起高礮之上力撲仍必多傷臣等現在另擘木
柵運往大礮轟摧官寨西路一面並排列劈山礮
位緊對寨門施放即黑夜中亦立標準安定方向
以轟擊使賊不敢出入往來況官兵東北一面近

山梁連日晴明被礮轟打已就塌燬而西南一面
令因拏柵用礮轟擊俟其傾頽並可多添一路兵
相機搶站賊必不能自守再八月二十九日黎明
有賊百餘來擾瑚尼爾圖營盤又面卡倫該員督
兵接應鎗箭齊發賊即敗逃惟外委徐沛奮勇追
殺中鎗陣亡奏入

上諭軍機大臣曰阿桂等奏攻克遜克爾宗水碓並旌
拏木柵用礮轟摧賊寨情形自可迅速攻打以期必

得又據奏以西路賊人尚有取水之處雖云來往紆
遠但賊人尚有可恃阿桂何不將此一併奪取設或
不能逕至其處即派健銳營烏鎗兵及索倫好弓箭
於賊人欲往取水之處逕為堵截儘力擊射賊自不
能以往使其飲汲無資必更窘迫於攻勦尤易得力
不但此處為然又將軍等攻勦所至如勒烏圍等處
皆當照此辦理至所稱二十九日賊擾瑚爾圖卡倫
外委徐沛出營追殺中鎗陣亡徐沛奮勇捐軀情屬

可憫著照千總例陣亡議卹以彰忠勇至賊匪當
此窮蹙之時尚敢潛出擾我營卡雖經官兵知覺
趕殺隨即竄匿但賊匪敢施此伎倆恐其伺我罅
隙更潛來逞其奸不可不時時防範各將軍叅贊
務飭各營卡將弁加意稽察防守勿稍疏虞

同日阿桂豐昇額色布騰巴爾珠爾奏言現在大
兵奮勇進攻亟期深入軍糧接濟關係非輕乃近
據摠兵富紳等稱各糧員等因糧米不敷支領每

兵十日口糧內或七日支領本色三日支領折色
或一半支領本色一半折支並將此十日一支之
處改為五日一支臣等思從前西北兩路出兵軍
營駝馬甚多是以偶有缺乏尚可資其餬口今此
地軍營並無牲畜即該糧員等欲將牛羊接濟而
合計此一路各處兵丁若每日照例折羊即須二
千餘隻諒必不能購如許多羊而土境牛隻尤少
是牛羊接濟之說不過托之空言至隨營各民所

携麵斤更屬無多盡數購取亦不足供一兩日之
需且此一路均係頑山並無莊稼即前此遜克爾
宗平田內畧有些微稞麥亦為大軍蹂躪已盡苟
非遇有大寨積存米石亦無從因糧於敵查兵丁
每日所領口糧八合三勺僅敷口食斷無絲毫存
積今止令支米四合一勺有零其餘折銀自行覓
食而軍營諸凡踴貴計所折銀四分只能買二兩
重餉餉一枚豈能果腹而各兵聞軍糧不繼更未

未免動心竊思西路軍糧夏間頗為充裕何以驟
至缺乏如此非但文綬富勒渾等前此並未提及
即隨營糧負亦直至數日前始行稟知其故殊不
可解相應請

旨勅下富勒渾文綬郝碩等將因何缺乏緣由明白回
奏

同日富勒渾奏言查自七月以來出口軍糧具報
短少經臣疊次咨明文綬並檄行軍需局迅速起

運復節次委員赴省將連日糧運情形面稟文綬
仍查詢因何遲滯據軍需局各省稱係時屆秋收
人夫雇募較難現復派附省各州縣加價雇夫一
萬名長運楸砥用資接濟臣又委成都府德克進
布赴灌採辦牛羊灰麵撥放折支其夫役口糧樽
節辦理今自八月初十以後核計具報長運滾運
每日已有八九百一千餘石不等似此可期無虞
查兩路軍營兵夫數萬日食浩繁前此赴運之米

必須計日案程運交楸砮以為加緊運供始可源
源接續現今藩司郝碩至大板昭與臣籌辦糧運
事宜商令該司於梭落柏古大板昭一帶來往稽
查以資彈壓並札商將軍阿桂飭令遣副將銜解
遜協同防守可免疏虞臣於拜摺後即馳赴楸砮
桃關灌縣一帶督辦查催務使兩路軍糈日形充
裕辦有就緒仍即馳回大板昭駐守均奏入

上諭軍機大臣曰阿桂等奏近日問官兵有支領半折

半本之事富勒渾文綬等于此並未提及請勅令明白回奏實是大奇西路軍糧夏間頗為充裕何以驟至缺乏竟係該處承辦之員辦理遲悞今日又據富勒渾奏馳赴楸砭桃關一帶督辦查催劉秉恬亦奏赴日爾拉等處專催料理並稱日內運糧情形已可接濟等語似此加緊催趲向或後不至復有短乏但軍營業經數日本折各半兼支則糧運已有遲悞情形罪難輕逭楸砭糧運又經該督等奏派同知張三禮

知府洪蕙在彼督辦不盡心籌畫竟致遲悞伊二人
自應即行治罪不宜復為姑容張三禮洪蕙俱着革
職即於楸砭枷號示衆俟大功告成該督等即行請
旨富勒渾文綬錢鑒貽悞糧運均難辭咎但富勒渾
身在大板昭一帶董促其過較文綬等為輕文綬錢
鑒駐劄省城一應軍糧皆應妥速供辦如云時屆秋
收人夫偏募較難即宜早為催覓驟頭設法趲運何
竟直至臨時致形竭蹶是文綬錢鑒較富勒渾之罪

又為倍之目今大功將成各有承辦之事姑從寬暫免治罪所有次加價僱夫費者著通計實數分作十分文緞錢釐著各賠四分富勒渾著賠二分以示懲儆仍俟大功告成後交部嚴加議處至郝碩不過隨同富勒渾往來查催非本省大員可比自可無庸責備朕於諸臣功過賞罰權衡稱量悉視其自取從無絲毫畸重畸輕況辦理軍務乎現以大兵深入之時軍食尤關緊要富勒渾文緞等經此一番懲創務須

加緊妥辦以期源源濟接寬裕籌辦倘或再有遲悞
必不能復為寬宥也

丙寅明亮舒常奏言臣等進攻木克什下接三碉
仍用礮攻擊木克什並排兩碉已將碉牆轟塌賊
人僅於碉後挖窖藏身時時放鎗支抵在營將士
急思乘勢下壓而秋深時候稍暖陰雨稍寒即當
下坡滑溜難施兵力本月初二日辰刻霧氣迷漫
探有賊番百餘人從甲索一路下來當令各兵靜


伏以待旋報西路下拖山腿亦有賊人於左側分
為一路山右派底分為兩路蜂擁而至當派各官
兵分為掩殺其甲索一路鎗聲響處賊人已先奔
潰被殺尚屬無多其西南山腿左右兩旁所來賊
人山徑陡仄難以退回轉即冒死向前我兵鎗箭
並發賊人紛紛滾跌及自相踐踏共見拖去尸身
約有數十餘具官兵止傷二十餘人惟四川外委
陳倫陣亡是夜賊人復由東北沙嘴山後乘昏夜

前來偷刼馬彪營卡並於泥峙崗都司張士儒營
盤之外用木板架搭濠溝希圖掩襲俱為官兵知
覺俱逃遁而去此時逆酋伎倆愈出愈窮且死
相繼為數日少亦必不能久延時日臣等俟山路
漸燥可以措足督兵進剿務期一舉克捷奏入

上諭軍機大臣曰明亮等奏賊人每次前來俱為官兵
知覺無不敗遁而去所辦甚好現當各路圍攻賊勢
日見窮促即屢次妄思偷刼營寨然其伎倆已迫無

難殄滅至每次將計就計殲擊賊衆亦足使么魔喪
膽但官兵不可因賊屢次挫敗稍存大意惟當益加
嚴密勿稍疏虞自足昨據阿桂奏稱上月二十九日
大礮鑄成天氣亦漸開霽初二日攻奪水碓後現在
天氣已晴計阿桂奏摺係四日拜發與明亮發摺之
期為日正同乃稱該處非雨即雪俟山路微燥即督
同進剿達爾圖山梁距阿桂軍營不遠何兩地陰晴
迥殊若此殊不可解或晴霽自南而北亦人不可知

此宜詢之明亮即行覆奏番地冬令晴日俱多連年
俱於冬月取勝轉瞬初冬天氣晴煦定能掃穴擒渠
迅速奏功將軍等各宜勉力為之



平定兩金川方畧卷一百五